

四庫全書

史部

欽定四庫全書

弇山堂別集卷九十

明 王世貞 撰

中官考一

余讀范蔚宗所論譏寺人而歎其德之無極也夫豎人
刁亂齊伊戾禍宋趙談伯子延年之屬即私而不及政
弘恭石顯及政而不及爵此猶其小者趙高挾始皇之
餘烈以禍儲嫡僇將相置庸主於股掌而樹之拉之位

至丞相爵為徹侯而及其危也乃更欲市國於東方之
兵以自王乃若東京之亂如蔚宗所稱舉動回山海呼
吸變霜露阿旨則光寵三族忤意則叅夷五宗高冠長
劍紆朱懷金者布滿宮闈苴茅分虎南面臣人者蓋以
十數府署第館棊列都鄙子弟支附過半州國金寶盈
牝於私藏歌舞充備於內室狗馬人食土木被繡皆剝
割氓黎以濟其欲構害明賢以樹其黨吁亦已極矣白
簡所陳間一挑之則逮竄立至或假司隸之權或憑方

岳之重幾幸先發事取快心或不能無一二勝者勝未
畢而敗隨之跡其荼毒迨有與炎燼同焰息矣三方鼎
峙司馬代篡以及六朝皆事由獨斷參寄文武雖阼有
變遷而禍絕閹豎北魏稍緩其防則宗愛矯太師劉騰
拜司空皆恣慘屠僂深謀脅僭唐之階重昉自楊高輔
國幽圉太上喋血椒宮爵擅真王稱為尚父重不可反
笑而後復有程魚仇田之僭擅李明復恭之諄逆雖強
藩星列禍不逮遠而九重惕息甘同赧獻跡其終始去

漢無異擊之不勝則賢者為陳實不肖者為訓注計窮
憤極則何進崔盾皆假手外兵而董卓朱見之釁成矣
宋之宣政梁師成為內童貫為外酣歌高飲以成靖康
之禍明興高皇帝神斷自天朋亡不昵雖制各監局以
處中貴人而不兼文武銜不侵外庭政不御外臣冠服
蓋三十年之間而官府謚如也文皇之始不能不有所
私寄是故儼保之諧幾得行而撫監岌岌矣監軍之勢
張而馬騏以交趾予敵矣天子幼沖母后不中制權必

有所歸而豎振遂滔天矣舉全盛之四海挾至尊之萬
乘而授手於鵲起烏合之虜恨其身死行陣不獲正司
敗辟而磔剪昆季悉籍資產足以紓泄臆憤洊開中興
斯則英主之效哉而丁丑一制為之湔洗何也吉祥之
創變積驕成怨積怨成逆汪直之啓釁縲紲盈朝尸骨
盈邊則此制媒之哉夫以孝廟之仁聖尚不能無李廣
而況蒙不省務狎游是好八虎橫三老絀瑾獨殞牙其
間祖宗之法度德澤蕩涸且盡幸而發自其偶以收全

勝然一瑾死百瑾生參伍狡黠表裏作奸非高廟神靈
鼎成期速明事殆有不可言者嘉靖之始不遠殷鑒悉
誅斥其渠首而又采輔臣之密贊與言路之指撻次第
收革諸鎮監軍朝野為之吐氣邊腹為之回色雖晚節
不無所嚮徇然不至如累季之弊以迨于今即有隱憂
而無顯患斯何下景帝焉夫振瑾至狼戾也公卿臺諫
至狐鼠伏也億兆至魚爛也然而不為漢唐之季者高
皇帝收天下之權以歸一人即狼戾如振瑾者一嚙而

憂再頻而危片紙中夜下而晨就縛左右無不鳥散獸
竄是以能為亂而不能為變也雖然不可恃也余故考
著為上下二編其灼然稱賢如懷恩覃昌雲奇何文鼎
者百不能一而振瑾吉祥汪直之類至不可勝數云

傳未成而今所存者皆從聖政記錄出之不為一字
增損以備異日史氏去取耳

吳元年九月丁亥置內使監秩正四品設監令正四品
承正五品奉御從五品內使正七品典簿正八品皇門

官秩正五品設皇門使正五品副從五品後改置內使
監御用監秩皆正三品各設令一人正三品丞二人從
三品奉御正六品典簿正七品皇門官秩正四品門正
正四品副從四品春宮門官正副同御馬司秩正五品
司正正五品副從五品尚寶兼守殿尚冠尚衣尚佩尚
履尚藥紀事等奉御秩俱正六品十二月丙寅定內使
冠服制凡內使冠用烏紗描金曲角帽衣用胸背團花
領窄袖衫烏角束帶

洪武二年六月己巳定置內使監奉御六十人尚寶一人尚冠七人尚衣十人尚佩九人尚履八人尚藥七人紀事二人執膳四人司脯二人司香四人太廟司香四人涓潔二人置尚酒尚醋尚麪尚染四局設正一人副二人置御馬御用二司設正一人副二人內府庫設大使一人副使二人內倉監設令一人丞二人及置東宮典璽典翰典膳典服典藥典乘兵六局局設局郎一人丞一人又置門官午門東華門西華門玄武門奉天門

左右順門左右紅門皇宮門坤寧門宮左門宮右門各設門正一人副一人東宮門官春和門東宮後門宮左門宮右門各設門正一人副一人

三年八月甲辰內定倉庫官品級設監令從五品丞從六品庫設提點從六品大使從六品副使從七品乙巳命改內使監御用監秩皆從三品其官令從三品丞正四品皇門官秩從四品門正從四品副正五品春宮門官正副同十月壬戌重定內使服飾之制上諭宰臣凡

內使監未有職名者當別置衣帽以別監官禮部定擬
內使監官凡遇朝會照依品級具朝服公服行禮其常
服葵花胸背團領衫不拘顏色烏紗帽犀角帶其內使
無品從者常服團領衫無胸背花不拘顏色烏角束帶
烏紗帽垂軟帶年十五以下者惟戴烏紗小頂帽從之
四年閏三月乙丑命吏部定內監等官秩品內使監令
正五品授中衛大夫丞從五品侍直大夫皇門官門正
正六品授內侍郎門副尚寶奉御俱從六品授內直郎

尚冠等奉御內府庫大使內倉監令俱正七品授正奉
郎庫副使倉丞俱從七品授正衛郎局正司正俱正六
品授內侍郎局副司副俱從六品授內直郎東宮門正
局正俱正六品授內侍郎門副局丞俱從六品授內直
郎王府承奉門正所正俱從六品授內直郎承奉副門
副所副俱正七品授正奉郎

五年六月丙子定宦官禁令凡內使於宮城內相罵其
先發而理屈者笞五十後罵而理直者不坐其不伏本

管鈐束而抵罵者杖六十內使罵奉御者杖六十罵門
官監官者杖七十內使等於宮城內鬪毆先鬪而理屈
者杖七十毆傷者加一等後應理直而無傷者笞五十
其有不伏本管鈐束而毆之者杖八十毆傷者加一等
毆奉御者杖八十毆門官監官者杖一百傷者各加一
等其內使等有心懷惡逆出不道之言者凌遲處死有
知情而蔽之者同罪知其事而不首者斬首者賞銀三
百兩

六年六月己酉更內倉監為內府倉以內倉監令為大使監丞為副使內府庫為承運庫仍設大使副使皆以內官為之乙卯以內官金麗淵為秦府承奉李清為承奉副劉壽吳祥劉旺潘亨為晉燕楚靖江府承奉副

八年二月壬申以內府鈔庫為寶鈔庫秩正七品設大使副使各一人以內官為之

九年五月庚子以內侍宗亮等七十四人為司香尚冠尚衣等職

十年十一月戊申置神宮內使監掌太廟灑掃陳設之事設監令正五品丞從五品司香奉御正七品典簿從九品天地壇祠祭署神壇署各設署令正七品丞從七品司香奉御正八品甲乙丙丁戊五庫庫設大使正七品副使從七品及置皇城門官端門承天門東長安門西長安門東安門東上門東上南門東上北門西安門西上門西上南門西上北門北安門北上門北上東門北上西門門設正正七品副從七品庚戌以內使金吉為

園丘署令洪斌杜慶為司香奉御

十二年四月丁巳置內府尚衣尚冠尚履三監針工皮作巾帽三局甲乙丙丁四庫改尚佩局為尚佩監

十六年三月乙卯置內府寶鈔廣源庫大使一人正九品用流官副使一人從九品用內官內府寶鈔廣惠庫大使二人正九品副使二人從九品俱以流官內官兼之職掌出納楮帛入則廣源庫掌之出則廣惠庫掌之十七年四月癸未更定內官諸監庫局及外丞運等庫

局品職尚宮局尚宮一人正五品司記司言司簿司闈
正六品掌記掌言掌簿掌闈正七品女使六人尚衣局
尚儀一人正五品司籍司樂司賓司贊正六品掌籍掌
樂掌賓掌贊正七品女使二人尚服局尚服一人正五
品司寶司仗司衣司飾正六品掌寶掌衣掌仗掌飾正
七品女使二人尚食局尚食一人正五品司膳司醢司
藥司饌正六品掌膳掌醢掌藥掌饌正七品女使二人
尚寢局尚寢一人正五品司設司興司苑司燈正六品

掌設掌輿掌苑掌燈正七品女使二人正功局尚功一人正五品司製司珍司綵司計正六品掌製掌珍掌綵掌計正七品女使二人宮正司宮正一人正五品司正一人正六品女使二人內官監通掌內史名籍總督各職凡差遣及缺員具名奏請設令一人正六品丞二人從六品典籍一人正九品所掌文籍以通書算小內使為之神宮監掌太廟祭器及祭祀灑掃設令一人正七品丞一人從七品奉御一人正八品尚寶監掌御寶圖

書凡用御寶則奉請然後付尚寶司官用之畢則捧入
設令一人正七品丞一人從七品尚衣監掌御用冠冕
衣服靴履設令一人正七品丞一人從七品奉御四人
正八品尚膳監掌御膳設令一人正七品丞一人從七
品司設監掌御用儀仗輦輅輿帳褥張設設令一人
正七品丞一人從七品奉御四人正八品司禮監掌宮
庭禮儀凡正旦冬至等節命婦朝賀等禮則掌其班位
儀注及糾察內官人員違犯禮法者設令一人正七品

丞一人從七品御馬監掌御廄馬匹設令一人正七品
丞一人從七品直殿監掌各殿灑掃陳設設令一人正
七品丞四人從七品小內使一十五人宮門承制掌傳
奉宣召設奉御五人正八品宮門守門官掌宮門灑掃
時其開闔譏察出入設門正一人正八品副四人從八
品內承運庫掌宮御金銀段疋等物設大使一人正九
品副使二人從九品司鑰庫掌皇城各門管鑰設大使
一人正九品副使四人從九品巾帽局掌造內府冠帽

設大使一人正九品副使一人從九品針工局掌造內
府衣服設大使一人正九品副使一人從九品織染局
掌織染段足設大使一人正九品副使一人從九品顏
料局掌燒造銀硃等項顏料設大使一人正九品司苑
局掌種蒔蔬果大使一人正九品司牧局掌牧養孳牲
設大使一人正九品皆於內官內選用外承運庫掌收
金銀段疋等物甲字庫掌收銅錢布疋顏料乙字庫掌
收衣服衾帳紙劄等物丙字庫掌收絲綿紗線丁字庫

掌收銅鐵錫香茶蠟諸物戊字庫掌收氍衫胡椒并支
收軍器廣源庫掌收貯寶鈔廣惠庫掌收支寶鈔每庫設
大使一人正九品副使一人從九品皆於流官內選用
隸戶部皮作局掌硝熟皮張成造靴鞋鞍轡兵仗局掌
造各項軍器寶源局掌鼓鑄銅器每局設大使一人正
九品副使一人從九品皆於流官內選用隸工部

二十五年二月己丑遣尚膳太監而聶司禮太監慶童
齋勅往諭陝西河州等衛所屬蕃族令其輸馬以茶給

之甲辰尚膳太監而聶等至河州召必里諸番族以勅諭之諸族皆感恩意爭出馬以獻於是得馬萬三百四十餘匹以茶三十餘萬斤給之諸族大悅而聶遣使入奏命以馬分給河南山西陝西衛所騎士

按此內臣奉使行事始也

二十八年九月辛酉重定內官監司庫局與諸門官并東宮六局王府承奉等官職秩內官監十一曰神宮曰尚寶曰孝陵神宮曰尚膳曰尚衣曰司設曰內官曰司禮曰御馬曰印殿曰直殿監皆設太監一人秩四品左

右少監各一人秩從四品左右監丞各一人秩正六品
神宮監掌灑掃太廟殿庭廊廡尚寶監掌御寶璽勅符
將軍印信孝陵神宮監掌灑掃殿庭及栽種果木蔬菜
之事尚膳監掌供養奉先殿并御膳與宮內食用之物
又督光祿司供奉宮內諸筵宴飲食之事尚衣監掌御
用冠冕袍服履舄靴襪之事司設監掌御用車轡床榻
衾褥帳幔諸事內官監掌成造婚禮粧奩冠舄傘扇衾
褥帳幔儀仗及內宮內使貼黃諸造作并宮內器用首

飾與架閣文書諸事司禮監掌冠婚喪祭禮儀制帛與御前勘合賞賜筆墨書畫并長隨當差內使人等出門馬牌等事及督光祿司供應諸筵宴之事御馬監掌御馬及諸進貢并典牧所關收付內官監收用及造內官諸人衣服鋪蓋諸事巾帽局掌造內官諸人紗帽靴襪及預備賞賜巾帽之事司苑局掌宮內諸處蔬果及種田之事酒醋麪局掌內官諸人食用酒醋麪糖諸物內承運庫掌收支段足金銀珠玉象牙諸寶貨之物及同

司鑰庫掌鈔之數司鑰庫掌各門鎖鑰及收支錢鈔之事內府供用庫掌御用香米及內用香燭油米并內官諸人飲食果實之類其東宮典璽典藥典膳典服典兵典乘六局各設局郎一人秩正五品局丞二人秩從五品惟典璽局增設紀事奉御秩正六品典璽局掌璽寶翰墨諸事典藥局掌同御醫修合藥餌供進湯液之事典膳局掌供進膳羞典服局掌冕弁冠帽袍服佩刀靴鞢諸物典兵局掌甲冑戈矛弓矢刀劍諸物典乘局掌

車馬之事其親王府承奉司掌王府諸事凡事則呈長史司并護衛指揮使司行之與內官衙門不相統攝設承奉正秩正六品承奉副秩從六品所三曰典寶曰典膳曰典服典寶掌王之寶設典寶正一人秩正六品副一人秩從六品典膳掌飲膳之事設典膳正一人秩正六品副一人從六品典服掌冠冕袍服諸事設典服正一人秩正六品副一人秩從六品門官二人掌王城宮殿門啓閉關防出入設門正秩正六品門副從六品設

內使十人司冠一人司衣三人司佩一人司履一人司藥二人司矢二人又各公主位下設中使司掌府中諸事司正司副各一人皆雜職

三十年七月庚戌置都知監秩正四品掌內府各監行移一應關支勘合設太監一人正四品左右少監各一人從四品左右監丞各一人正五品典簿一人正六品又置銀作局掌造內府金銀器用設大使一人正五品副一人從五品

永樂元年九月己亥遣內官李興等齎勅勞暹羅國王

昭祿羣膺哆囉諦刺并賜王文綺帛及銅錢麝香諸物

與其貢使偕行

按此內臣奉使
外夷之始也

三年七月辛亥內使王琮同給事中畢進封故真臘國

王長子參烈昭平牙為王

按此內臣封
夷王之始也

是年三月命太監鄭和等率兵二萬七千人行賞賜西

洋古里滿刺諸國

按此內臣將兵之始也和自是凡三
下西洋皆有功人謂之三寶太監

五年三月辛巳復改上林署為上林苑監秩正五品有

左右副丞典簿之屬凡設十署秩正七品俱以內臣及

文職相兼之

不審何年
準內臣

八年都督譚青等營有內官王安王彥之三保托克托

按此

內臣監軍之始也

然名次青等後

其年勅內官馬靖往甘肅巡視如鎮守西寧侯宋琥處

事有未到處密與之商議務要停當爾却來回話

按此
內臣

出鎮之始也然職尚

止巡視事畢回京

十八年立東廠命內官一人主之刺大小事情以聞

按此

不見正史會典據大學士萬安奏成化十二年增立西
廠環內云東廠之設自文皇帝至于今五十六年故攷
此訂于

二十二年六月辛卯上崩於榆木川太監馬雲等以六
師在遠外秘不發喪與大學士楊榮金幼孜議含歛畢
載以龍輦所至御幄朝夕上食如常儀壬辰次雙筆峯
大學士榮御馬少監海壽馳訃皇太子

洪熙元年正月丁未命內官監太監鄭和領下番官軍
守備南京在內與太監王景弘昭布哈唐觀保協同管

事遇外有事同襄城伯李隆駙馬都尉沐昕計議而行

按此南京守

備之始也

其年二月勅甘肅總兵官都督費獻鎮守太監王安

按此

鎮守之始見者也計

永樂末已有之矣

宣德元年七月上以漢王反遣指揮譚順內官黃讓內

使陳錦助平江伯陳瑄鎮守淮安

按是時內臣尚列于指揮之下也

七年賜司禮監太監金英范弘等免死詔內弘詔略云

克勤夙夜靡一事之後期致謹言行惟一心之在國退

不忍于欺蔽進必務于忠誠免爾死罪於將來著朕至

意于久遠

按太宗於光祿卿并泉張泌皆有之則具時內臣所必有者但不可考耳此見范弘墓誌

史所不載也

賜御用太監王瑾銀記四曰忠肝義膽又曰金貂貴客
曰忠誠自勵曰心跡雙清見水東日記又司禮太監金
英范弘各有銀記之賜而又不傳見墓誌景廟於興安
王誠舒良輩亦各有賜憲廟賜司禮監太監譚昌牙記
二曰忠誠不怠曰謙亨忠敬銀記一曰才華明敏石記

一曰補衮宣化世廟賜司禮監太監張佐銀記四曰集
謀補德曰端忠誠慎曰輔忠曰勵忠麥福銀記一曰公
勤端慎右皆於墓碑中錄得之正史所不載也然則內
臣之膺賜者蓋不止於此矣

正統元年遣太監阮安同都督沈清少保吳中督造三

殿

按此內臣督工
之可見者也

四年遣太監吳誠吉祥監督諸軍討麓川宣慰司思任發

敗績

此內臣總
兵之始也

六年三殿工完太監阮安僧保各賜黃金五十兩白金

一百兩綵段八表裏鈔一萬貫

按此內臣功賞之至厚者也

七年陞太監王振姪千戶山為錦衣衛世襲指揮同知尋命山侍經筵

九年太監

缺

出喜峯口曹吉祥出界嶺口劉永誠出劉家

口但住古北口同成國公朱勇等各率精騎萬人征烏

梁海陸賞有差

其年賜遼東鎮守太監伊實喀歲米四十石

此內臣加祿之見於

史者
也

十年賜司禮監太監王振并各監太監錢僧保高讓曹
吉祥蔡忠白金寶楮綵幣諸物仍命振姪林為錦衣衛
世襲指揮僉事僧保姪亮讓姪玉吉祥弟整忠姪英俱
為錦衣衛世襲副千戶勅振曰朕惟旌德報功帝王大
典忠君報國臣子至情此恩義之兼隆古今之通誼也
爾振性資忠厚度量宏深昔在皇曾祖時特以內臣選
拔事我皇祖深見眷愛教以詩書玉成令器委用既隆

勤誠益至肆我皇考念爾為先帝所器重特簡置朕左
右朕自春官至登大位前後幾二十年而爾夙夜在側
寢食弗違保衛調護克盡乃心贊翊維持靡所不至正
言忠告裨益實多茲特勅賜給賞擢為爾後者以官詩
曰無德不報書曰謹終惟始朕眷念爾賢勞昕夕不忘
爾尚體至意始終如一致我國家有無疆之休爾亦有
無窮之聞

十二年遼東鎮守太監伊實喀揚宣以征討功給歲祿

三十六石伊實喀給七十二石十二石為一級

十三年寧陽侯陳懋為總兵官率師討鄧茂七等太監

曹吉祥王瑾監督神機火器

按此內官監鎔之始也

十四年大理寺卿俞士悅等以春夏二時不雨恐刑獄不清所致請會審刑部都察院獄以消天變上命太監

金英同三法司堂上官審之

按此內臣五年審錄之始也出則齋勅張黃蓋騎導

於大理寺為三尺壇中坐尚書以下俱左右列坐

其年敵入寇德勝門外勅太監興安李永昌往同武清

伯石亨尚書于謙整理軍務

按此內臣總京營兵之始也

景泰三年總督少保尚書于謙總兵武清侯石亨等議
選精兵十五萬分為十營太監阮讓都督楊俊提督四
營太監陳瑄盧永都督郭震馮宗各提督三營俱聽謙
亨及太監劉永誠吉祥節制

按此內臣坐營之始也

天順元年正月以迎駕功陞太監曹吉祥嗣子錦衣衛
帶俸指揮僉事欽為都督同知姪鉉及太監劉永誠姪
孫聚蔣冕弟成葉達兄成俱為錦衣衛世襲指揮僉事

且賜吉祥等勅書褒諭之

是年封司禮監太監曹吉祥姪欽為昭武伯

按此內臣子弟封爵

之始也欽亦自以戰功及從奪門封後反誅戚化初御馬監太監劉永誠姪聚封寧晉伯從永誠積戰功至都

督自以破西

虜功世襲

正德中泰安伯張富司禮監太監永兄也安定伯容永弟也高平伯谷大寬提督團營太監大用兄也永清伯大亮大用弟也鎮安伯魏英司禮監太監彬弟也平涼伯馬山提督東廠太監永成姪也鎮平伯陸永監鎗太

監閭姪也皆冒永等恩澤封後俱革馬山雖貴衣蟒圍
玉為永成汲水澆花調馬於庭他亦往往類是

天順元年詔復司禮監太監王振官爵立祠賜額曰旌

忠

按此內臣立祠之始也成化中御馬監太監劉永誠
祠曰褒功弘治司禮監太監懷恩祠額曰顯忠此二

臣皆可紀者自是
而後繁且濫矣

八年命太監周中於奮武營右少監王亨耀武營太監
唐順練武營右少監林貴奉顯武營太監張溫敢勇營
右少監趙永果勇營奉御鄭達効勇營右少監米童鼓

勇營左副使高廉立威營奉御王璇伸威營右副使張

璘揚威營奉御張紳振威營監神鎗仍聽太監劉永誠

節制

按此內臣分坐十二營之始也

成化三年御馬監太監葉達奏以長河峒功蒙賜寶鈔幣帛辭之而陞兄錦衣衛千戶官兵部執以無例不許

詔特陞為指揮僉事

此辭賞乞陞之始也

十二年命御馬監太監汪直立西廠領勅制事

按此立西廠之

始也雖與東廠侔而勢出其上矣十三年革西廠以御史戴縉言仍復之

御馬監太監汪直初以緝事功加歲米二十四石以靖
邊功加三十六石以威寧海功加四十八石以黑石崖
功加三百石後累至四百八十石至正德中司禮監太
監張永初以恩加歲米十二石以平寧夏逆瑾功加四
十八石以獲妖人功加一百二十石後累至三百餘石
大約米至七十二石則視文武官為正一品而僉從衣
料亦累增益不可勝計蓋又王振劉瑾之所無也自永
後谷大用魏彬張雄張銳張忠輩亦及之按張司禮佐

初加歲米四十八石其後復加祿十有七皆十有二石
當為二百四十二石麥司禮福至三百七十石黃司禮
錦至五百石皆在嘉靖間具神道碑其他可以類推矣
正德元年春正月太監陳寬傳旨神機營中軍二司內
官監太監劉瑾管五千營御用監太監張永管神機營
并顯武營神機營右掖御馬監徐智調中軍頭司管奮
武營而以司設監太監馬永成代智御馬監太監王潤
代瑾五月以御馬監太監魏彬管神機營中軍頭司并

奮武營

按此八虎之初見也

二年太監李榮傳旨邊關隘口等處切近京師舊設守備內官仍舊添補薊州黃崖口等營以都知監左少監屈讓臺頭營以都知監右少監王鑑永平太平寨青山營以司設監左少監萬釗遵化灤陽等關以印綬監右少監劉睿劉家口營以都知監右少監丞高永薊州鮎魚石等處以印綬監右少監李準峨眉山等營以御馬監左少監馮旺黃花鎮以都知監左監丞張鼎天城兼

管神銳以御馬監左監丞張仁淮安衛等處以都知監左
監丞王景和龍門所等處以都知監右少監孟山各守
備萬全左衛等處以都知監右少監畢安分守蓋自時
諸邊無餘地矣又增提督團營太監苗達張永軍伴各
百人坐營坐司太監黎安等各三十五人又增五軍神
機三千等營太監馬永成魏彬甯瑾谷大用軍伴各百
人坐司內官劉倍等各三十人是年太監李榮傳旨御
馬監太監谷大用之父奉御用監太監張永之父友俱

陞錦衣衛指揮使

此內臣父見在授官之始也

其年又贈御馬監太監丘聚司設監太監馬永成御馬監太監魏彬之父俱錦衣衛指揮使贈母淑人各與祭

一壇

此內臣贈父母之始也史謂恩禮濫施前此所未有者

三年太監李榮傳旨御馬監官勇士旗軍係禁兵重務其令太監谷大用提督太監楊春坐勇士營李堂坐四

衛軍營

此內教場之漸也

其年復立西廠尋改惜薪司外薪廠為之以太監谷大

用領焉其年添設內辦事廠於榮府舊倉地以司禮監
太監劉瑾領之兼察兩廠及內諸司事

太監劉瑾傳旨谷奉張友俱陞都督同知復贈劉瑾父
三代俱為都督同知

四年太監劉瑾奏疏通鹽法四事旨謂經畫周詳防範
嚴密誠為國家重務既多官會議戶部查算明白經久
通行軍民戶口食鹽仍舊餘俱永遵行之司禮監立碑

在側時常省察

按司禮監立碑非典也

五年兵科給事中屈銓奏請判定正德元年以後見行

事例編集成書頒布中外詔許之

按此皆劉瑾所變更者也國子祭酒王雲

鳳時亦

有請

其年太監張永提督三千神機二營兼掌十二團營掌

乾清宮事兼掌御用監提督尚膳尚衣司設內官諸監

整容禮儀甜食諸房并豹房浣衣局混堂司南海子事

按內臣兼職

之至多者也

其年命御用監太監張永總督寧夏等處軍務御馬監

太監陸闇管領神鎗選京管精兵三萬人討安化王寘

鐫兵部言舊無總督軍務太監關防特造給之

按楊一清為永

纂志云特給金關防金瓜鋼斧楊與永同事所見必真故紀於此永之西征及還師上皆幸東安門戎服送迎

其年以寧夏功加張永祿米歲四十八石賞銀五百兩

紵絲五十表裏時兵部尚書王敞等會英國公張懋尚

書劉機等議以仇鉞功止一方已封伯爵世襲永輯寧

中外兩建奇功又非鉞比於是永兄富弟容俱封伯給

誥券勛號尋加司禮監太監溫祥賴義谷清秦文范宣

張欽祿米歲各十二石賞銀一百兩綵幣四表裏太監
谷大用兄大寬馬永成兄山魏彬弟英伯爵如容富例
十一月贊皇知縣王鑒疏稱太監張永功言今歲五月
赤旱千里永奉辭西征遇真定大雨隨澍百姓稽首曰
天上雨露張公帶來也永不坐乘不張蓋不作威福真
今之皋夔伊傅先後數千言極其諛媚上覽奏褒永亦
百餘言再賜勅獎諭

六年太監張永捕薊州男子王豸足涅龍文及人王字

以為妖異兵部尚書何鑑請加永恩典下廷臣議永疏
辭詔以永有功固讓再加祿米歲百二十石賜勅褒獎
正德七年以山東河南賊平總督太監谷大用陸閭歲
加祿米四十八石蔭弟姪各一人錦衣衛世襲指揮使
監鎗張忠尹生歲加祿米二十四石蔭弟錦衣衛世襲
正千戶御馬監太監丘聚祿米如張忠大用弟閭姪尋
進封伯如永

九年起太監張永掌御用監仍總制提督宣府大同延

綏等處軍務發京營兵二萬人禦邊復發京兵六千人使太監張忠監督之聽永節制忠請自為一軍不許

其年贈司禮太監張淮父全為錦衣衛都指揮使母李

為夫人廖鑒父文應母張亦如之皆予祭葬

贈都指揮之有祭葬

自全文應始也

贈御馬監太監于經父母亦如之并賜香山寺祠額護勅授司禮監太監張雄父千戶銳為後府都督支俸朝參

賜鎮守浙江太監劉璟生祠額護勅尋賜代璟者王堂亦如之

十年兵部上打魚王山等處捍禦功內批司禮監太監蕭敬歲加祿米二十四石溫祥賴義秦文張雄張欽蔣貴韋霖張淮并御馬等監太監谷大用張永魏彬張銳俱歲祿十二石各廕弟姪錦衣衛世襲正千戶

十三年以應州功太監張永魏彬張忠各歲加祿米二十四石廕弟姪一人為錦衣衛正千戶佛保馬英趙林

蘇進馬審許全李審劉祥各歲祿十二石廕錦衣衛百戶又加司禮監太監蕭敬溫祥賴義秦文張欽蔣貴韋霸張淮李英團營太監谷大用東廠太監張銳歲祿廕官如張永等

十四年以營建乾清宮定礪廕總理提督御用監太監張永東廠太監張銳內官監太監劉養御馬太監孫和團營太監谷大用司禮太監蕭敬魏彬溫祥賴義秦文張欽韋霸張淮李英弟姪各一人為錦衣衛正千戶管

工內官監太監劉祥劉永趙俊王銳班浩汪俊趙銳崔
文王富溫璽周永各副千戶世襲

其年命御馬太監張忠提督軍務同威武副將軍安邊
伯朱泰平賊將軍右都督朱暉討寧王宸濠命鎮守撫
按等官悉聽節制上尋以太師威武大將軍鎮國公總
督軍務命太監張永率團營臺後及宣府北路官軍提
督贊畫機密重務平虜伯朱彬亦如之以捕獲妖賊加
太監張忠歲祿米二百二十石仍陞廕弟姪三級

嘉靖元年三月勅吏兵二部朕入繼大統賴爾内外文武勲戚大臣定策并迎立各宣忠悃保安社稷今山陵及微稱大禮事畢宜加殊恩以答元功大學士楊廷和蔣冕毛紀首先定策忠義大節功尤顯著俱進封伯爵給與誥券子孫世世襲食祿一千石餘官如故俱仍在内閣辦事大學士費宏廕他一子錦衣衛指揮使世襲親捧信符迎立等官駙馬都尉崔元進封侯爵給與券誥子孫世世承襲食祿一千五百石皇親太傅壽寧侯

張鶴齡加太師祿米三百石禮部尚書毛澄加太子太
傅廕他一子為錦衣衛世襲指揮同知太監張錦廕他
弟姪一人錦衣衛世襲指揮僉事定國公徐文祚中途
有疾先已賞了罷司禮監各能同心贊襄大計太監扶
安溫祥賴義秦文張欽張淮各歲加祿米三十六石廕
他弟姪一人為錦衣衛世襲指揮同知蕭敬歲加祿米
三十六石廕他弟姪一人為錦衣衛世襲指揮使黃偉
鮑忠各歲加祿米二十四石廕他弟姪一人為錦衣衛

世襲指揮僉事從朕藩邸効勞年久左右朕躬各有功績張佐歲加祿米四十八石廕他弟姪一人為錦衣衛世襲指揮使一人為世襲正千戶黃英歲加祿米三十石廕他弟姪一人為錦衣衛世襲指揮同知一人世襲正千戶戴永歲加祿米三十四石廕他弟姪一人為錦衣衛世襲指揮僉事一人為世襲百戶張忠歲加祿米二十四石廕他弟姪一人為錦衣衛世襲指揮僉事刁永馬俊賈友陳宣國洪趙山黃錦李清王竝孫端各

廕他弟姪一人為錦衣衛世襲正千戶趙霖李堂李雲
張陞蘇瑾郭紳趙林張曷劉臣劉銳丁玉劉榮各廕他
弟姪一人為錦衣衛世襲百戶督兵迎駕道路惠安伯
張偉歲加祿米三十石侍郎鄭宗仁趙璜各陞俸一級
當時在朝宗人府五府六部都察院大理寺通政司等
衙門掌印各官賞紵絲二表裏銀二十兩科道官各賞
紵絲一表裏銀十兩皇親太保建昌侯張延齡加太傅
祿米一百石指揮邵喜進封伯爵副千戶邵輔陞指


揮僉事百戶邵佐陞正千戶指揮蔣輪進封伯爵蔣山
蔣壽陞錦衣衛世襲正千戶慶陽伯夏臣加散官一階
舍人夏勲陞錦衣衛世襲正千戶如勅奉行

五年六月大學士費宏等言皇考實錄成其於聖謨睿
德紀載頗為詳實然臣等不敢自以為功也蓋累朝實
錄皆有章奏可據若今獻皇帝三十餘年之事臣等所
賴以考據者則有司禮監太監張佐黃英戴永編實錄
一冊載獻帝睿製序文及各年章奏為詳功當首論後

又得司禮監太監楊保陳清錦衣正千戶翟裕陸松所
纂脩之助功當併論伏惟上裁上從其言命廕佐等各
弟姪一人以酬其勞佐指揮僉事黃英戴永俱正千戶
楊保百戶陳清總旗俱錦衣衛世襲翟裕陸松俱陞指
揮僉事時佐英永已用扈駕功賜廕心不自安上疏辭
上嘉其誠懇許之仍令原廕指揮使張琦於錦衣衛堂
上管事指揮同知黃壽陞指揮使僉事戴仁陞指揮同
知

隆慶元年二月上加恩內臣歲加司禮監太監黃錦祿米二十四石廕弟姪一人錦衣衛指揮僉事王本馮保各弟姪一人錦衣衛正千戶胡明喬朗曹憲各弟姪一人錦衣衛百戶從龍太監梁鈿李芳歲加祿米三十六石廕弟姪一人錦衣衛指揮同知張仲舉翟廷玉陳鈿陶金呂用崔玉高相楊義張恩各廕弟姪一人錦衣衛正千戶宋朝用張潤楊添爵馮明夏雲嚴用李佑各廕弟姪一人錦衣衛副千戶張廷周保王榮李忠李鑾趙

朝郭陽李惠趙忠陳忠李祿各廕弟姪一人錦衣衛百
戶于統劉用各廕弟姪一人錦衣衛所鎮撫俱世襲



弇山堂別集卷九十



欽定四庫全書

史部
弇山堂別集卷九十一至四

詳校官編修_臣李潢

編修_臣張謙謨勛

總校官中書_臣朱鈐

校對官修撰_臣吳錫齡

謄錄監生_臣周文彬

欽定四庫全書

弁山堂別集卷九十一

中官考三

明 王世貞 撰

洪武元年三月丙辰上謂侍臣曰吾見史傳所書漢唐
末世皆為宦官取靈不可拯救未嘗不為惋歎此輩在
人主之側日見親信小心勤勞如呂強張承業之徒豈
得無之但開國承家小人勿用聖人之深戒其在宮禁

可使之供灑掃給使令傳命令而已豈宜預政典兵唐漢之禍雖曰宦官之罪亦人主寵愛之使然向使宦者不得典兵預政雖欲為亂其可得乎

二年六月己巳上命吏部定內侍諸司官制諭之曰朕觀周禮所記未及百人後世至踰數千卒為大患今雖未能復古亦當為防微之計古時此輩所治止於酒漿醢醢司服守祧數事今朕亦不過以備使令非別有委任可斟酌其宜毋令過多又顧謂侍臣曰此輩自古以

來求其善良千百中不一二見若用以為耳目即耳目蔽矣以為腹心即腹心病矣馭之之道但常戒飭使之畏法不可使之有功有功則驕恣畏法則檢束檢束則自不敢為非也

三年九月丁巳是日朝退有雨二內使乾靴行雨中上見召責之曰靴雖微皆出民力民之為此非旦夕可成汝何不愛惜乃暴殄如此命左右杖之因謂侍臣曰嘗聞元世祖初年見侍臣有著花靴者責之曰汝將完好

之皮為此豈不廢物勞人此意誠佳大抵為人嘗歷艱
難則自然節儉若習見富貴未有不侈靡者也因勅百
官自今入朝遇雨雪皆許服雨衣

四年閏三月乙丑上謂侍臣曰古之宦豎在宮禁不過
司晨昏供役而已自漢鄧太后以女主稱制不接公卿
乃以閹人為常侍小黃門通命自此以來權傾人主及
其為患有如城狐社鼠不可以去朕謂此輩但當服事
宮禁豈可假以權勢縱其狂亂吾所以防之極嚴但犯

法者必斥去之不令在左右戒履霜堅冰之意也

十年五月丙午有內侍以久侍內廷從容言及政事上
即日斥遣還鄉里命終身不齒遂諭羣臣曰自古賢明
之君凡有謀為必與公卿大夫謀諸朝廷而斷之於己
未聞近習嬖倖之人得與謀者况閹寺之人朝夕在人
君左右出入起居之際聲音笑貌日接乎耳目其小善
小信皆足以固結君心而便僻專忍其本態也苟一為
所惑而不之省將必假威福竊權勢以干與政事及其

久也遂至于不可抑由是而階亂者多矣朕嘗以是為鑒戒故立法寺人不過侍奉灑掃不許干與政事今此宦者雖事朕日久不可姑息決然去之所以懲將來也羣臣頓首稱善

十七年七月戊戌勅內官毋預外事凡諸司毋預內官監文移往來上謂侍臣曰為政必先謹內外之防絕黨比之私庶得朝廷清明紀綱振肅前代人君不鑒於此縱宦寺與外臣交通覘視動靜夤緣為奸假竊威權以

亂國家其為害非細故也間有奮發欲去之者勢不得行反受其禍延及善類漢唐之事深可歎也夫仁者治于未亂智者見于未形朕為此禁所以戒其未然耳

建文三年燕王師在德州而朝遣錦衣千戶張安持詔諭世子降許以燕王之位世子不發封并縛安詣軍前時中官黃儼從留守以姦險為世子所惡而素結三郡王乃先遣人馳報上曰朝廷與世子通密謀矣王不信俄而世子所縛安及書至王大感悅儼與江保於永樂

中數為趙王

即三郡王

傾太子

即世子

幾奪嫡太子即位儼保

皆伏誅

永樂五年六月己亥上諭都察院謂去年曾命內侍李進往山西採天花此一時之過後甚悔之更不令採比聞進詐傳詔旨偽作勘合招集軍民復以採辦為名大為民害所在官司都不奏來此與胡藍齊黃欲壞國事者何異即遣御史二員徑詣山西將進等一千鞠問明白械送京師必寘重法若都司布政司有干涉者并鞠

治之雖闕皇親亦不恕

七年十二月戊申守京城門內使言城門郎擅離所守縱酒廢事城門郎亦言嘗以母病白內使暫歸未嘗擅離蓋嘗以事忤內使故挾私誣構皇太子曰城門郎無罪內使小人縱私上罔朝廷下誣無罪之人豈可復用命下錦衣衛治之乃命司禮監榜示今後內官內使有言事不實及挾私枉人者悉置重典

二十二年十月庚辰內官馬騏傳仁宗旨諭翰林院書

勅付騏復往交趾閱辦金銀珠香時騏被詔名還未久
本院官覆奏上正色曰朕安得有此言卿等不聞渠前
在交趾荼毒生民乎交趾自此人歸一方如解倒懸今
又可遣耶遣之非獨詔書不信將壞大事乃止

按上既
已知之

矣乃不
騏何也

宣德元年七月辛未司禮監太監侯泰還自樂安上初
遣泰諭漢王高煦高煦嚴兵而後入覽書謂泰曰朝廷
知我舉兵耶泰曰有言者上以至親故不信也高煦曰

爾舊人宜知我舉兵故泰曰不知也高煦曰太宗聽讒
間削我兩護衛徙置此州仁宗不復我護衛不徙我大
郡而徒以金帛餌我安能鬱鬱久居此乎因命徧觀其
兵馬器甲曰以此橫行天下可也為語而主即送姦臣
來然後議我所欲泰歸上問高煦何言曰一無所言問
治兵乎曰無所見已而錦衣官校從者白其事上曰事
定必治泰不可宥也二年十一月復以奉命直隸選駙
馬擅作威福凌虐職官捶義勇經歷董純至死又受人

贓賄事覺始下都察院獄

三年逮交趾太監馬騏內官蒙泰下獄正統四年騏始釋為民泰降火者

六年十二月內官監太監袁琦內使阮巨隊阮誥武莽武路阿可陳友趙淮王貴楊四保陳海等伏誅初巨隊等往廣東等處公幹以採辦為名虐取軍民財物事覺下錦衣衛究其由皆琦指使於是籍其家金銀以萬計寶貨錦綺諸物稱是又所用金玉器皿僭侈非法皆四

保與海為之事覺上下法司議罪命凌遲琦而斬巨隊
等十人於市時太監裴可烈亦以貪暴下錦衣衛獄拷
死馬俊回至良鄉自經死命錦衣衛磔其屍梟首於市
唐受亦以公差南京害民捕至獄具械赴南京凌遲於
市梟首示衆丙申諭右都御史顧佐等出榜曉諭中外
凡先所差內官內使在外侵占官民田地及擅造房屋
所在官司取勘明白原係官者還官軍民者還軍民中
外官民人等有受內官內使寄頓財物許首免罪若匿

不首事覺與犯者同罪自今內官內使出外敢仍前有犯令所在官司具奏治以重罪知而不奏罪同若中外軍民人等有投托跟隨內官內使因而撥置害人者悉處死罪上退朝御乾清宮諭太監王瑾吳誠等曰朕即位以來念內官內使隨侍勤勞恩待甚厚屢戒諭之令謹守法度勿罹刑辟永享太平其間有能小心忠謹朕待之加厚不意袁琦孤恩負德越禮犯分欺瞞朝廷受人囑托私遣內使出外假以幹辦虐害官吏軍民百計

索取金銀財物數以萬計下人銜冤歸怨於上朕何由
知天地鬼神共怒事發露琦以伏誅此非朕欲罪之殺
身之禍實其自取爾等其揭榜昭示內官內使及小火
者能守法事上不恃寵作威不害民取財者鬼神佑之
若違法越禮惟務貪虐鬼神不佑國法不赦若先嘗有
過後當改悔朕亦以無過待之

少保行在工部尚書吳中私以官木磚瓦遺太監楊慶
作私第甚弘壯上登皇城樓望見之問左右得其實逮

中下獄論斬錦衣衛指揮王裕知而不舉當連坐上宥
中罪革其少保仍罰尚書俸一年裕下獄已而釋之內
官裴宗漢管木廠坐盜市官木又賄太監楊慶求免罪
事發法司亦論斬命械繫錦衣獄一時英斷赫然第不
知於楊慶作何處耳

金吾衛指揮同知傅廣自宮願効用內庭行在禮部以
聞上曰已有例禁此人身為指揮尚欲何求而勇於自
殘求進其付刑部治罪當是時京衛官尚未貧也而內

臣自鄭和王瑾後其富貴勢焰有以歆動之耳

釋故城縣丞陳銘復任先是上聞內官內使差遣在外者多貪縱為害已嘗罪其尤者上以太監劉寧清謹忠良命同監察御史馳往各處盡收其貲橐并其人械送京師既還道經故城縣丞銘素悍暴又時大醉而酗聞有內官至更不問所從來輒奮前捽寧而手擊之御史莫能止遂奏丞無狀逮至上曰丞固可罪以其一時昧于所聞而宥之侍臣或言銘酗酒擅擊朝使陛下縱赦

之亦不可使復任上曰朕既釋之矣彼當因此知改過也

正統五年太監吳誠吉祥以討麓川不利下獄論死遇
恤刑宥之

七年南京尚膳監內使郭敬失火焚內府廊房六十餘
間所貯物料器皿七十二萬五千五百有奇及錢糧簿
守衛衣甲皆盡下法司獄具詔即斬之

八年內使張環顧忠匿名寫誹謗語錦衣衛鞫之得實

詔磔于市仍令內官俱出觀之所誹謗者王振也磔之者亦王振也

九年內官陳景先送女官吳淑清還揚州索取府衛白金綵幣等物且治私事踰期復命詔錦衣衛鞫實

十年戶部右侍郎焦宏等奏臣同司禮監左監丞宋文毅等奉命踏勘壩上大馬房諸處草場多被內官內使人等侵占私役軍士耕種甚者起蓋寺廟立室治及借與有力之家耕種以致草場窄狹馬多瘦損請正其罪

上曰朝廷設馬場令內官監之而乃作弊如此論法當罪今姑寬貸令速改過其內官各賜地一頃內使淨軍各賜五十畝已蓋寺廟者勿除餘悉還官都察院仍給榜禁約每歲遣給事中御史各一員巡視敢蹈前非者必殺不宥

鎮守遼東太監王彥卒上命太監喜寧檢閱其家財產妻吳氏訴喜寧私取其奴僕駝馬金銀器皿田園鹽引等物詔宥寧罪追取田園鹽引給主餘物悉入官

司禮監太監吳亮金英范弘阮誠以私芻牧於南海子
下錦衣獄

謫監察御史李儼戍遼東鐵嶺衛儼在光祿寺監收祭
物太監王振過之怒儼應對不跪遂下錦衣獄已而謫
之

十年錦衣衛卒王永為匿名書數太監王振罪惡揭之
通衢及振姪王山家緝事者得之刑部論以造妖言斬
罪詔即磔之于市不必覆奏十二年武功中衛指揮使

華嵩宿娼事發當杖贖特命髡其首漆之枷示教坊門
滿日充大同衛軍坐與王振姪爭娼故也

十二年太監喜寧侵太師英國公張輔輔不從寧弟勝
率自淨身家奴毀輔佃戶居室毆家人妻墮孕死事發
宥勝贖徒自淨身者戍廣西南丹衛因勅禮部盡收功
臣私蓄閹奴入官

十四年七月甲午車駕親征北敵發京師是舉也司禮
太監王振實勸成之故羣臣雖合章諫止上皆不納命

下二日即行扈從文武吏士皆倉卒就道丁丑車駕至
宣府風雨大至邊報益急羣臣復交章請駐蹕王振怒
俱令略陣壬寅車駕至雞鳴山衆皆危懼上素以諸事
付振至是益肆威成國公朱勇等有所白膝行而前振
令戶部尚書王佐兵部尚書鄺埜管老營佐埜先行振
怒令跪于草中至暮方釋欽天監正彭德清勸振曰敵
勢如此不可復前倘有踈虞陷天子於草莽振怒詈之
曰設若有此亦天命也學士曹鼐曰臣下命不足惜主

上係宗社安危豈可輕進振終不從八月己酉駐蹕大同振尚欲北行鎮守太監郭敬密告振曰行則必墮敵計振始懼會驟雨復至始議班師庚戌師東還是夕次雙寨雷電風雨交作師行徹夜不止初議從紫荆關入振蔚州人也始欲邀駕幸其第既又恐損其鄉土禾稼復轉從宣府行壬戌次土木敵襲擊我師大潰車駕北行中官惟喜寧侍振等皆死庚午郕王御午門左門都察院左都御史陳鑑合諸大臣廷啓六科十三道亦有

言王曰汝等所言皆是朝廷自有處置言甫畢百官皆趨進跪慟哭不起颺言曰聖駕被留皆振所致陛下若不速斷何以安慰人心錦衣衛指揮馬順喝逐百官給事中王竑奮臂捽順髮嚙其肉曰順倚振肆強今猶若此誠奸黨也百官爭捶死順且請籍振家王准言衆猶哭未退守衛士卒亦泣下王起入令太監英問所欲言咸曰內官毛貴王長隨亦振黨請寘諸法遂於門隙中出二人又捶死之尋執王山至衆相戒勿捶死使伏法

遂縛山赴都市凌遲處死王令諭曰國家多難皆因奸邪專權所致今已悉准所言置諸極刑籍沒其家以謝天人之怒以慰社稷之靈爾文武羣臣務須各盡乃職以輔國家以濟時艱百官乃拜而退或棄順等屍於道軍民猶爭擊不已百官請籍順及毛貴王長隨家王令免籍

是月令旨籍沒太監郭敬內官陳官內使唐童等家以皆王振黨也科道會劾僧錄司右覺義龔然勝道錄司

右玄義王道宏錦衣衛鎮撫周銓等賄囑馬順引進王振家出入積成巨富令旨降謫有差復請誅籍之不許九月法司疏王振同居異姓之人皆當斬詔謂振傾危社稷罪惡深重但朕即位之初體天地生物之心姑屈法伸恩但係振本宗不問大小皆斬首以徇婦女給發功臣之家為奴其家人婚者宥死杖一百發戍邊衛是日鎮守大同太監郭敬潛回京師下獄初敬與振厚連年多造銅鐵箭鏃甕盛以振意遺衛拉特使臣輒用良馬

賂振及敬以報宋瑛等楊和之敗又為敬所制上皇至大同羣臣劾敬失律振矯旨不問至是法司議凌遲處死詔錮禁之

十月御馬監左少監布爾罕伏誅布爾罕本降虜給事宮禁數十年及土木之敗即助敵反攻射內使黎定既又為敵使至京有所需索命執而誅之

十二月誅遼東百戶實達爾見獲敵泄我虛實且數為敵使張彼聲勢又為托克托布哈致意於鎮守太監伊實

喀至是逃歸巡按御史劉孜鞠之因劾伊實喀本廣西人敵犯廣寧伊實喀禁制官軍不使出擊反狀昭然且及其不法十餘事詔即誅實達爾仍置伊實喀不問

景泰元年三月叛賊御用監太監喜寧伏誅寧既從上皇陷敵輒為額森畫策邀求賞賜及導以入邊寇掠尚書于謙授策邊將使成擒而會上皇知寧謀患之乃言於額森欲使寧及總旗高蓋達于納克楚還京索禮物額森許之上皇乃命校尉袁彬以密書報宣府寧至獨

石遂為參將楊俊所誘擒至京文武大臣并科道等官
劾奏寧猥以俘虜游沐恩榮受列聖之深恩居太監之
重任而乃欺天負國背義忘恩屬姦臣之不軌致上皇
之蒙塵喜寧回自敵中詐傳詔旨妄指迎駕為名重要
朝廷金帛既又乘機復往主令賊首來侵擾我邊境犯
我京畿上而宗廟震驚下而軍民荼毒雖天威所加而
數萬之衆遂遁奈生靈受害而千古之恨難消若不正
之典刑碎屍萬段不惟無以大彰天討垂戒將來抑亦

無以慰宗社之靈臣民之忿詔羣臣雜鞫之具伏命磔
諸市三日

金英者正統中司禮太監也王振沒掌監事景帝以其
擅權惡之命言官論其家奴郭廉趙顯多支浙鹽謫戍
邊衛復以運使吳方受囑勒為民復以錦衣衛校尉結
英冒陞百戶於午門外探聽各處事情抵英論斬復調
御史謝琚為吉安府推官降給事中張聰為均州判官
御史宋瑬為安福縣典史俱坐英事琚應奏不奏聰代

王訟稿瑯奏事不實為法司所論也又運同鄭崇受英家人賄多支鹽事露囓御史林廷舉求解杖廷舉百戍邊衛崇為民又以錦衣指揮僉事呂貴因賊侵境陞署都指揮僉事出征及還貴恐調出失勢託英家人錦衣衛百戶金善以賄英得辭陞職仍舊官又索營繕所甃瓦等料萬餘以造私室賂管海子內使葉景榮景榮以石及草與之事覺下都察院論貴善景榮俱應斬英宜究治詔斬金善降調貴於邊衛景榮送司禮監別用賍

物俱追入官執英付都察院鞫之左都御史陳鑑等言
英縱家人倚勢多支官鹽累受賄賂陞指揮韓志等為
署都指揮僉事陞內使汝佳為長隨奉御陞都指揮孫
鏜為都督總兵陞校尉劉信為百戶工部尚書石璞結
王振得職英受璞賂以保其位又准呂貴仍理錦衣衛
事姦惡如此宜不拘常律處以極刑籍沒其家帝命錮
禁英執鏜璞志鞫之論罪皆應斬命姑宥之再犯不宥
金英家奴李慶罪當絞遇赦特誅之御史宋璠坐不劾

調用璫奏左都御史王文沮之文奏璫應免不允見誣
詔不問仍降璫按英之狼狽若此不知異日復受寄託
然其拒南遷議稱薛文清好官亦不可盡泯也

是年十月庚寅山東右布政使裴綸言山東內地與邊
徼異已有都御史洪英巡撫督同三司常操軍士保固
城池兼今歲禾稼豐登流移復業正當靜以優恤不宜
煩擾今內官唐廣來鎮茲土有司日逐供給未免動取
民財以一科十且廣隨侍人不無詐冒名目生事侵漁

請勅廷臣會議凡非邊境有巡撫官處俱命回京庶內臣無輕出之勞有司免供應之擾帝曰往歲各處賊寇生發人民流散因令內官鎮守得知事情緩急今綸擅欲取回主意安在爾都察院令其陳狀如飾辭不宥六科給事中上章謂鎮守巡撫內外官員俱受朝廷委托恐其從人需索贓物如綸所言者亦不可必其無也命巡按御史及按察司官庶有此等之人即執之具聞處置既而綸陳情服罪宥之

景泰初太監吳誠卒其妻某氏進所遺田宅以四所還之大同右參將都督同知許貴奏右少監韋力轉衛軍妻不與宿杖死其軍又與養子妻淫戲射死養子下巡按御史覆勘有驗都察院請再覆從之

景泰二年鎮守內官陳海以鐵劒與夷人哈丹易馬御史鄭紹劾奏捕鞠之又司禮監太監高顯情強奪人房屋仍飾奏命法司禁錮之

五年內使田福私亡至真定藁城縣錦衣衛捕得詔即

誅之內使阮絹附司禮監太監興安囑管工太監黎賢
擅於西海子作佛菴及西山等處作生墳佛寺盜用官
木等料萬計事聞都察院坐絹絞并劾安等罪詔姑不
問所造菴寺令內官監毀之物料入官

南京御史鄒亮奏定淮等門外城壕為太監陳公等占
種蓮藕禾苗命南京戶部委官勘覈禁約

六年都知監左少監馬琳奏太監劉順死遺下河間府
山地十五頃乞賜管業戶部覆請之詔不許給民耕種

完辦

按景帝不假內豎如此南城之禍所由構也

天順元年正月壬午執司禮太監王誠舒良張永王勤等於禁中出付錦衣衛獄羣臣言誠等串同都督黃珌構成邪議更立東宮尋又謀迎已出汪后又與少保于謙王文等圖為不軌糾合逆旅迎立外藩俱坐謀反凌遲處死丙戌命斬于市籍其家是日校尉逮梟縛錦衣百戶楊瑛謂為張永親且與舒良善命錦衣衛拷訊之又命錦衣衛差官往執寧夏管神銃內官高平公幹雲

南內官閹禮并籍其家以來俱磔於市鐘鼓司掌事陳
義教坊司左司樂晉榮伏誅景泰中榮論事義義承旨同
榮選伎女李惜兒等先後進入宮中至是教坊司發其
事命司禮監釋伎女給親榮義下錦衣衛拷訊具伏誅
於市戊子六科十三道劾司禮監太監興安竊弄威權
紊亂朝政鎖南內之門易東宮之位與王誠舒良等為
黨明知逆謀不能諫阻而同儕乘機心持兩端觀成敗
以為向背乞梟其首以戒權姦旨謂安罪本當死姑從

寬貸之勿令視事癸卯誅司設監太監廖官保御馬監
太監郝義司禮監少監許源官保提督御藥房上嘗索
藥不得故也義坐與王誠等同謀欲發勇士擒殺吉祥
石亨等源故從上南內坐謗訕俱誅

二月戊寅枷內官劉茂於內府新房外茂嘗被旨以馬
載唐妃游西海子馬驚妃墜因命茂選良馬二十日控
習之上復位有言茂欲擒太監劉永誠者遂執下獄枷
之內官監太監覃吉掌內庫金帛奇寶籍記邨王所賜

諸妃白金三萬餘兩寶石萬餘不以聞命執送錦衣衛
錮禁之丁未六科十三道被旨劾司禮監太監陳鼎阮
簡謂鼎內與王誠舒良同腹心外以王文于謙為羽翼
擁立郕王廢易太子始則倡不必北迎之謀終則造幽
閉南宮之計禁聖母往來絕親親之情抑百官朝賀廢
君臣之義傾竭府庫崇尚異端忍令僧人清昊為魔魅
數致僧官道豎入禁闈俱宜顯戮于市以快人心以回
天變上曰給事中御史言是此輩負國背君罪在不赦

但元惡已誅餘黨俱從輕典其擯鼎居南京司禮監簡
守長陵永不任用癸亥廣西柳州衛千戶盧忠鎮守寧
夏太監高平伏誅景泰時忠為錦衣衛指揮平居尚衣
監與忠厚忠密與平合謀令校尉李善奏上與太監阮
浪南城內使王瑤圖復位於是浪瑤及忠俱下錦衣衛
鞠瑤被殺浪瘐死忠得釋既而坐他事謫官柳州至是
上知其狀特遣人收忠平磔于市三日且籍其家乙亥
工部右侍郎霍瑄先以參政掌大同府事時嘗為鎮守

太監希力轉怒其送回都御史年富家衆杖之十餘至是瑄奏之且言力轉宴輒命妓為戲僭用金器若王者復強取所部女為妾諸不法事上怒遣人執之太監希力轉以工部右侍郎霍瑄奏其罪下錦衣衛獄遂條奏瑄嘗同都御史年富侵盜官物且行賂於都督石彪強取所部女子十三人為妾都察院請收瑄與力轉質其有無上命俱宥之辛丑調給事何玘等十三員為判官監察御史吳禎等二十三員為知縣尋命復職太監曹

吉祥忠國公石亨以御史言其過惡欲箝制言路共譖御史給事中之短上命吏部尚書王翱查御史給事中年三十五以上者留任三十五以下者調用得玘禎等三十六人俱調之命既下會有風雷雨雹之變上悟名翱等諭之曰給事中御史朝廷近侍耳目之官何乃聽人主使妄劾人論法難容但念職當言路俱留任事自後言事務須從實否則治以重罪不貸十月丁酉賜故太監王振塋祭時太監劉恒等言振恭勤事上端謹持

身左右贊襄終始一德陷沒土木歲久未沐招葬上亦
憫念振故有是命

四年七月甲午廣東廉州知府李遜為鎮守珠池內使
譚記誣奏其縱部民竊珠下遜錦衣衛獄遜悉發記杖
人致死及強入民家斂財物諸罪狀上命執記與理記
具伏遂錮之而命遜復職辛丑勅鎮守浙江太監盧永
曰爾在彼行事執拗以此差左少監陳政齋捧旨意前
去同爾理事政於六月十二日至彼三司官俱出城迎

接行禮爾乃托病不出却使人問政是何官買辦何物
此爾懷姦挾詐不敬朝廷之罪一也十三日方至武林
驛與政相見不請旨意行禮不問朝廷公事就便辭去
此爾背公徇私不敬朝廷之罪二也十四日又至館驛
前因開門遲即發怒而回却言政嘗為吾部下且官不
及吾此爾輕慢使臣不敬朝廷之罪三也爾昔與張永
郝義等同類內有典刑降用者此時曲法宥爾又陞爾
職委鎮大藩正當赤心報國以報再生之恩却乃心懷

姦詐傲慢朝廷悖禮違法論爾之罪正當抄提來京究治今且將爾所為實跡封去爾宜自看似此所為豈是忠敬之道看畢爾即具實以聞

五年七月庚子司設監太監曹吉祥及其姪昭武伯欽等反命懷寧侯孫鏜等率官軍討之欽敗死執吉祥下獄初正統間吉祥征麓川又征福建選降將能騎射者百十人隨征天順初諸降將吉祥親黨及門下無賴隨吉祥以奪門迎駕功累受陞賞者甚衆皆感戴吉祥後

石亨敗隨亨冒陞賞者俱自首改正獨隨吉祥者不動吉祥復日犒諸降將月給以米銀布遂相與為死黨諸降將日出入其門惟恐吉祥敗而已隨之黜退也吉祥亦自疑與石亨同功一體之人亨既被誅愈不自安至是欽又私掠曹福來為言官所劾錦衣衛密遣人伺察之益急先石亨敗時預降勅戒諭朝臣然後收繫亨至是復降勅諭欽度不免遂謀反會懷寧侯孫鏜奉命征西欽使其黨掌欽天監事太常寺少卿湯序擇是日天

未明視朝遣將欽欲以是時舉兵入先夕召諸降將及其黨羣飲于家厚贈之時鐘侯陞辭宿于朝房降將都指揮使馬亮等恐事敗自欽家逸出走告恭順侯吳瑾廣義伯吳琮時琮瑾亦以陪祀罷宿朝房急趨以告鐘同于長安右門隙入疏以聞上即召吉祥縉入宮城鎖繫之今皇城四門京城九門毋開頃之欽以亮等逸出知事泄遂于中夜自往錦衣衛指揮同知逮杲宅執殺杲遣其黨殺左都御史寇深于西朝房斫傷內閣學士

李賢于東朝房遂攻皇城東西長安門不得開縱火焚之門內守衛官拆御河岸磚石堆塞各門賊往來嘯呼于各門外鏜召太平侯張瑾同擊賊瑾不敢出鏜謂其二子曰征西官軍多從京城宣武門出爾往號召之曰法司強賊反獄獲者有重賞且不可出城於是官軍稍集至二千人甲兵皆具鏜謂之曰爾等不見西長安門火耶曹欽反矣其黨不多當奮勇殺之朝廷必不惜陞賞衆皆諾從鏜逐賊至東長安門欽去攻東安門途遇

恭順侯吳瑾追殺之復縱火焚東安門天漸曙欽黨稍
稍散去欽遇鎧子軌于路軌奮刀斫欽中膊欽氣懾率
數騎走安定東直齊化各門求去門俱不開遂竄歸其
家拒官軍鎧督軍與戰頃之會昌侯孫繼宗亦集兵至
時大雨如注欽率家衆及降將猶出戰數次鎧令軍士
能殺賊獲其財即與之於是官軍奮呼而入欽投井死
遂毀其宅盡掠其財物其兄都督鐸弟指揮鉉及堂兄
都督濬皆為衆所殺并其親黨同謀之家皆一空焉諸

降將逸出者先後皆被誅辛丑命公侯伯朱儀等分守
皇城六門都城九門以反賊黨未盡就擒也壬寅命撫
諭都人及保定等處降將或為反賊所脅從者無得驚
疑癸卯曹吉祥伏誅上出吉祥命羣臣廷鞠之具伏詔
磔于市并磔欽鐸濬等尸以徇丙午太常寺少卿掌欽
天監事湯序等伏誅序始以天文生出入吉祥曹欽家
冒迎駕功累陞至禮部侍郎後以占候天文失實降少
卿懷怨望降將陳守忠丁順白忠等亦以附吉祥冒迎

駕功陞都督同知等官至是序為欽選舉兵日時守忠
順忠從欽犯闕俱被執磔于市籍沒其家戊申降將都
督同知額森特穆爾從曹欽反既越城逃至通州民瓜
田中盜食瓜民欲毆之額森特穆爾窮蹙吐實民執送
鎮守官械赴京法司論當凌遲處死上命錦衣衛禁錮
之

弇山堂別集卷九十一